

Regional News Unit AIR Aizawl

Thursday, July 11, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Agriculture Minister Pu PC Vanlalruata hovin Green-Ag hnuaiah Lunglei leh Mamit district khaw 38-a hnathawhna tur hmanrua semchhuah a ni.
- SAGY Phase IV, Muallungthu khua leh Phase V, Ratu khua chungchang ngaihtuahin Aizawlah MP Lok Sabha Pu Richard Vanlalmangaiha leh MP Rajya Sabha Pu K. Vanlalvena te hovin an thukhawm.
- Prime Minister Narendra Modia chuan Federal President of Austria Alexander Van der Bellen chu nizan khan Vienna ah a kawm.
- Union Health Minister JP Nadda kaihhruiin Ministry official ten ramchhunga dengue hrileng do tura hmalakna ngaihtuah a ni.

<><><>

AGRI MINISTER

Nimin khan Agriculture Minister pisaah Global Environment Facility kaltlang a Green-Ag cum Green Landscape Information Platform (GLIP) hnuai a hmalakna enho niin Lunglei leh Mamit district chung a khaw 38-a hnathawhna tur hmanrua semchhuah nghal a ni a. Agriculture Minister Pu PC Vanlalruata chuan he hun hi a hmanpui a ni,

Agriculture Minister Pu PC Vanlalruata chuan Green-Ag kaltlanga Mizoram chhunga ramngaw humhalh chung a kuthnathawktute tana enzawna ngelngnet siam tura hmalakna kalpui a ni chu lawmawm a tih thu sawiin Green-Ag kalpuina State hrang hrang zing ah hmahruaitu nih tum zel turin thawktute a chah a. Kuthnathawktute tihmasawn tur a thawktu an ni tih hre reng turin leh neitu nihna thinlungpu chung a rinawm tak a hna thawktu turin a fuih baw a ni. Minister chuan Green-Ag cum GLIP chu ei leh bar a kan intodelhna kawng a hmanraw pawimawh tak a nih a beisei thu sawiin a thil tum te hlawhtling tak a kalpui zel a nih theih nan uluk zawkin Agriculture Department-a thawktuten an vilpui zel tur thu a sawi baw a ni.

Addl. Director Pu R.Lalnunzira chuan Mizoram a Green-Ag thil tum te tihlawhtling tur chuan inpekna leh neitu nihna thinlungpu chung a thawktuten hna an thawh a pawimawh thu a sawi a. Kuthnathawktute harsatna leh mamawh zirchiang a, an mamawh mil a ruahmanna siam leh chung ruahmannate tih hlawhtlin ngei a nih theih nana bawhzui chak turin thawktute a fuih a ni.

Report a tarlan danin Green-Ag hi Sustainable Development Goals leh Food & Agriculture Organisation thil tum thenkhat tihlawhtling tur a hmalakna pawimawh tak a ni a. Mizoramah hian Lunglei leh Mamit district-a khaw 38-ah hmalakna kalpui mek niin kum 2027 thleng aw h tur a ruahman a ni.

Kuthnathawktuten ramngaw tichereu lo zawng a eizawna ngelnghet an neih theih nan ruahmanna hrang hrang siam niin Farmer Field School kaltlangin loneitute leh ran vulhtute hnen ah zirtirnate pek thin a ni a. Village Implementation Committee din niin khaw hrang hrangin an mamawh mil zel a ruahmanna siamin hmalakna kalpui thin a nih thu tarlan a ni.

<><><>

ASF

Hortoki bul Tlawng luiah Tlawng hnar lam atanga leng thla Vawk thi ruang hmuh ani a, Vawk thi hi kar kalta tawp lam ah pawh hmuh anih tawh thu Pu Zoramthara, Hortoki Vawk Vulh Assn President chuan Kolasib a Akasvani corr a hrilh.

Tunkar thawhlejni khan Hortoki khaw mi Tlawng hnar lama hnathawka kal te chuan Vawk thi (ruang) hi 7 vel an hmu niin thudawna pakhat chuan a sawi a. Vawk thi an hmuh tawh zawng zawng hi 10 vel anih an rin thu an sawi a ni.

Tlawng hnar lam atanga Vawk thi len thlak te hi Hortoki khaw kai-ah a tangkhan loh nan Mau tlawn in lui mawng lamah hawlh thlak ani thin a, tui in lui mawng lamah a len thla zel niin thudawna chuan a sawi. Hetiang hi thil awmdan anih avangin Lui mawng lama chengte an fimkhur a ngai hle a. Tun dinhmunah Vawk thi te hi a paihtu hriat ani rihlo.

Hortoki Vawk Vulh Association President Pu Zoramthara chuan, Tlawng luia Vawk thi len thlak chungchang ah hian Mizoram Pig Farmer Assn President hnenah thil awmdan phone hmanga hrilh in, Vawk thi thlak thenkhat pawh a thawn tawh thu Kolasib a Akasvani corr a hrilh a. Hemi bawhzui hian Mizoram Pig Farmer Assn hruaitute chuan Sairang Police Station ah FIR an thelut ni a hriat ani baw.

Nimin khan Animal Husbandry and Veterinary Dept chhinchhiah danin Mizoramah vawk pulhri -African Swine Fever (ASF) vangin vawk 106 thiin vawk 218 suat a ni a.

ASF vang hian Mizoramah kumin January thla atanga nimin thleng khan vawk 5427 thi nia report a ni a, vawk suat tawh zawng zawng hi vawk 10258 a ni tawh a. Nimin bika vawk thi zat hi Aizawl District ah vawk 55 a ni a, Serchhip District ah vawk 50 leh Kolasib District ah vawk 1 a ni a. Tihian nimina Mizoram chhunga vawk thi zat hi vawk 106 a ni a.

Nimin vek khan Mizoram chhungah vawk 218 suat a ni a. Aizawl District ah vawk 144 suat a ni a, Serchhip District ah vawk 52, Kolasib District ah vawk 4 leh Khawzawl District ah vawk 18 suat a ni baw a ni.

<><><>

LUNGLEI

Lunglei DC ruahmanna in, Magistrate, Vigilance & Monitoring Committee YMA Sub Hqrs Lunglei, Legal Metrology, Police leh Lunglei District Consumer Assn ten Iron Rod bûk dik leh diklo leh Digital Weighing Machine an hmang ngei em tih Lunglei khawpui chhunga dawr hrang hrangah an endik.

Endiktu Team te hi Lunglei North leh South ah inthenin, Iron Rod dawr hrang hrang 25 chuang endikin Digital Weighing Machine hmang mumal an awmloh thu leh heng Digital Weighing Machine hmanglo te hi a rangthei ang bera hmang turin hriattir nghal an ni.

A tlangpui Iron Rod te hi Per Piece in an hralh thu dawr neitute hian an sawi vek a, Bukna hmanga hralh an awm meuhlo a ni.

Endikna atanga Digital Weighing Machine hmanglo te leh Iron Rod bûk tlinglo te chunga hmalak dan tur hi DC Lunglei ho a sawi ho leh tur a ni ang. Iron rod lei tur Mipuite pawhin bûkna hmang ngei a lei theuh turin endiktu team te chuan an ngen a, harsatna neite chuan Legal Metrology Department hnenah Report theih reng a ni an ti.



AIRPORT ROAD

Nimin atang khan lirthei te chi tlan tlang theihin Lengpui Airport road hawn a ni tih PWD chuan a sawi.

PWD lam chuan lirthei te chi tal kal thei turin nimin zing atang khan thawkin, lungin side drain an hnawh a, chhun dar 12:30 velah an hawng thei ta a ni.

PWD hotute chuan lungfûn hmanga kawng chhuat bal thuam tha turin hma lak tan nghal a ni an ti a. Lung funna GI wire net hi henglaiah a quality tha a awm mai lova Silcharah chah a ni a, vawiin hian a lo thlen hman beisei a nih thu leh Hna thawh chhung chu Medium leh Heavy vehicles te chu Buichalli bridge lamah la kal zel tur a ni an ti bawk a ni.

Tun dinhmunah Kawng chhuat bal chu CE hovin an zirchiang mek a, Rang zawka lirthei lian chi tan pawh kal theih nan siam tuma ruahman dan an zirchiang mek a ni.



SAGY

District Level Committee on Sansad Adarsh Gram Yojana (SAGY) Phase IV, Muallungthu khua leh Phase V, Ratu khua chu nimin khan Aizawlah MP Lok Sabha Pu Richard Vanlalhmangaiha leh MP Rajya Sabha Pu K. Vanlalvena te hovin an thukhawm a. Heng khua - model village pahniha hmasawna hnathawh tur lo duan lawk tawh 'Village Development Plan' bawhzui dan leh an tun dinhmun te sawiho a ni.

Ratu khua hi Rajya Sabha MP Pu K. Vanlalvena'n Model Village a thlan zing ami a ni a. Hmasawna hna hrang hrang 32 chu department sawm chuangin an thawh tur Village Development Plan hnuaiah hian dah niin, chung zinga 18 chu zawh fel tawh a ni.

Muallungthu hi Lok Sabha MP hmasa Pu C. Lalrosanga'n Model Village atana a thlan zing a mi a ni a. Village Development Plan hnuaiia hnathawh tur hrang hrang sawmnga chuang duanchhuah atangin zaa 71 zawhfel tawh a ni.

Meeting-ah hian MP te chuan hnathawh hmabak la awm te chu a rang lama bawhzui turin department aiawhte chu an chah a. Hnathawh zawh tawh a nih chuan report pek vat thin npawimawh an tih thu an sawi bawk.

SAGY hmalakna hnuaiia hian MP te'n Model Village atan an duh khua an thlang thin a. Chung Model Village-ah chuan khawtlang mamawh leh tulte sawiho in Village Development Plan te duan a ni a. Chu Plan chu tihlawhtling turin Line department hrang hrangte thawhhona hnuaiia hma lak thin a ni.

<><><>

KOLASIB

Kolasib bialtu MLA Pu Lalfamkima, Assembly Dy Speaker chuan nimin khan Urban Primary Health Centre (UPHC) sakna hmun tur Kolasib Vengthar a tlawh.

Kolasib Vengthar-a Urban Primary Health Centre (UPHC) sakna hmun tur a tlawh hnu hian Dy Speaker leh Health Department hotute leh Vengthar khawtlang hruaitute chu Circuit House-ah inkawm in, chak zawka hmalak anih theihna tur thil pawimawh hrang hrang an sawiho a, UHPC chu vantlangin-a an chhawr tangkai thuai theih nan ruahmanna siam te in, Building sak zawh anih hma a luah lailawk turin Vengthar Community Hall an ruahman.

UPHC hian Doctor pakhat; Nurse pathum; Laboratory Technician pakhat; Pharmacist pakhat; Data Entry Operator cum Councillor pakhat leh Health Worker pahnih a keng tel dawn a ni.

Inkawmhona ah hian thusawiin, Dy Speaker Pu Lalfamkima chuan, Vengthar khawtlang hruaituten khawtlang in a mamawh em em UPHC sakna hmun tur phal taka an pe thei chu lawmawm a tih thu leh Health Department hotuten theihtawp chhuaha hma an lak pui avangin lawmthu a sawi ani.

<><><>

PM

Prime Minister Narendra Modia chuan Federal President of Austria Alexander Van der Bellen chu nizan khan Vienna ah a kawm a. Hruaitu pahnihte hian India-Austria thawhdunna leh khawvel thilthleng te an sawidun a. Environment humhalh zel tur leh khawvel lum chak mek leh sik leh sa inthlak te an sawidun a ni.

Nimin vek khan Prime Minister Narendra Modia hian Austrian Chancellor Karl Nehammer chu Vienna ah kawm bawk a. India leh Austria inkara thawhdunna leh thil pawimawh dang tam tak an sawidun. Hruaitu pahnihte hian sumdawna leh investment te, Science leh Technology te, green energy, AI, start-up, environment leh sik leh sa inthlak chungchangte, mipui hnam ziarang inhriatpawh tawn leh mipuite inpawhna lam hawi te an sawidun a. Ram pahnih inkar bakah khawvel thil thleng pawimawh te an sawi dun bawk a ni.

Prime Minister Narendra Modia chuan a thuchhuah siamah khawvel mihringte tana chona lian ber tuna khawvelin a tawn mekte an sawidun a. Heng zingah hian sik leh sa inthlak nasa leh firfiaka chetna te pawh a tel a ti a. Austria chu International Solar Alliance, Collision for Disaster Resilient Infrastructure leh Bio-fuel Alliance ah te tel ve turin a sawm nghal a.

Ukraine buaina leh Asia thlang lama buaina thleng mekte sawidunin Pu Modia chuan indo hun anih tawh loh thu a sawi lang a ni a ti.

Prime Minister hi Vienna-ah sawrkar chawimawina famkim nen ropui taka lo hmuah a ni a. India mi cheng thahnem takin an lo hmuak bawk a. Kum 41 hnua India Prime Minister zinga Austria tlawh leh hmasa ber a ni a.



UNION HEALTH MINISTER

Union Health Minister JP Nadda kaihhruiin Ministry official ten ramchhunga dengue hrileng do tura hmalakna ngaihtuah a ni. New Delhi-a chanchinbumite hmaah Pu Nadda chuan a ministry in dengue venna, hrileng khuahkhirh leh enkawlina tur scheme a ruahman a ti a. State thuneitute nen inrawnin tan an la mek a ti a. A ministry chuan engtiklai pawha biak theih tur helpline a siam tih sawiin state sawrkar te pawh ni 4-5 chhungin heng helpline te hi siam turin a a chah a. Union Health Ministry chuan inter-sectoral leh inter-departmental meeting a buatsaih dawn tih sawiin Education,leh Housing and Urban Development te nen an thukhawm ang a, ruahmanna an siam tur thu a sawi bawk a ni.

Hei bakah hian Pu Nadda chuan ni hnih chhungin dengeu avanga buai nasa zual state pahnihte a thutkhawm pui dawn bawk tih sawiin central hospital te chu dengue enkawlina tur bik ward siam a, mipuiten engtiklai pawha an pan theih tura inruahman turin a ti a.School-ah te inkaihhruiina tichhuak thuai tura a tih thu a sawi bawk a ni.

